

Här Claude Wiseler
President vun der Chamber



Ministère de l'Agriculture, de l'Alimentation et de la Viticulture	8
Référence : 493/2024	
15 JUL. 2024	
A traiter par :	
Copie à :	

Lëtzebuerg, den 12. Juli 2024

Här President,

Esou wéi d'Chambersreglement et virgesäit, bieden ech lech, dës parlamentaresch Fro iwwert **den administrativen Opwand an der Landwirtschaft** un **d'Madamm Ministerin fir Landwirtschaft, Ernährung a Wäibau** weiderzeleeden.

Esouwuel op europäeschem wéi op nationalem Plang gëtt de Besoin fir administrativ Vereinfachung am landwirtschaftleche Beruff diskutéiert. D'administrativ Laascht déi d'Bauer:innen ze droen hunn ass iwwert d'Jore gewuess a féiert dozou dass si ze vill Zäit virum Computer verbréngen mussen. Op europäeschen Niveau goufen am Kader vun dësen Diskussiounen am Numm vun der Vereinfachung verschidden Ëmweltoplagen opgeweecht, a weider Vereinfachunge stinn an der Diskussioun.

An dësem Kader gouf vun der europäescher Kommissioun eng Online-Ëmfro ausgeschafft, bei där Landwirt:innen konnten indiquéiere wéi vill Zäit se mat administrativen Aufgabe verbréngen a wéi si d'Komplexitéit vu verschiddene Prozeduren a Reegelen aschätzen.

An der selwechter Kommissioun gouf op meng Nofro hin erkläert, dass et zu Lëtzebuerg nach keng konkret quantitativ Evaluatioun vun der administrativer Charge vu Landwirt:innen gemaach gouf.

An dësem Kontext, erlaben ech mer folgend Froen ze stellen:

1. **Wat sinn d'Hauptconclusiounen vun der europäescher Online-Ëmfro par rapport zu de Grënn fir d'administrativ Charge an d'Aschätzung vun der Komplexitéit vu Prozeduren a Reegelen ?**
2. **Ugesinn dass d'Thema vun der iwerméisseger administrativer Charge an de Besoin fir administrativ Vereinfachung aktuell eng vun den Hauptuleiessen aus dem landwirtschaftleche Secteur ass, gedenkt d'Madamm Ministerin eng Etude an Opdrag ze ginn, déi d'administrativ Charge quantitativ a qualitativ evaluéiert ?**
3. **Wann jo, wéini wäert dës Etude ausgefouert ginn, wat wäert präzis studéiert ginn a fir wéini kann ee Resultater erwaarden?**
4. **Wann nee, ass d'Madamm Ministerin net der Meenung dass eng evidenzbaséiert Politik och an dësem Beräich vu Wichtigkeet ass an des Donnéeën wichteg wiere fir e Maximum u**

Landwirt:innen duerch zilgeriicht an effizient Vereinfachunge maximal ze entlaaschten ?

5. Nach ëmmer am Fall wou keng Etude an dësem Sënn soll duerchgefouert ginn, wéi gedenkt d'Madamm Ministerin sécherzestellen, dass hir Politicken am Beräich vun der administrativer Vereinfachung hiert effektiivt Zil errechen?

Mat déiwem Respekt,



Joëlle WELFRING
Deputéiert



**Äntwert vun der Ministerin fir Landwirtschaft, Ernährung a Wäibau op d'parlamentaresch Fro n° 1000
vun der éierbarer Deputéierten Joëlle Welfring**

**1. Wat sinn d'Hauptconclusiounen vun der europäescher Online-Ëmfro par Rapport zu de Grënn fir
d'administrativ Charge an d'Aschätzung vun der Komplexitéit vu Prozeduren a Reegelen ?**

Déi éischt virleefeg Resultater aus der Ëmfro vun Abrëll 2024 sinn op der Internetsäit vun der DG Landwirtschaft ze liesen : https://agriculture.ec.europa.eu/news/simplification-survey-sheds-light-specific-issues-faced-farmers-v-eu-2024-04-12_en.

Déi definitiv Resultater si fir de spéiden Hierscht ugekënnegt ginn. D'Ëmfro ass bei wäitem net representativ. Eng 60 Baueren aus Lëtzebuerg hunn un der Ëmfro matgemaach. Et ginn aktuell keng lännerspezifesch Resultater publizéiert. All Resultater bezéien sech op de gesamten EU-Raum.


D'Ziel vun der Ëmfro war et :

- D'Belaaschtung vun de Baueren duerch Prozeduren a Reegele verbonne mat finanzieller Ënnerstëtzung am Kader vun der gemeinsamer Agrarpolitik (GAP) ze verstoen, souwéi aner EU-Reegele fir Liewensméttel an d'Landwirtschaft an der EU;
- D'Identifizéiere vu Quelle vu Suergen a Komplexitéit bei der Ëmsetzung vun dësen Politicken an den EU-Länner.

Déi éischt Conclusiounen:

- 33% vun de Befroten brauche méi wéi 6 Deeg am Joer fir administrativ Aufgabe verbonne mat GAP-Hëllef ze erleedegen. Fir 24% vun hinne sinn et 5 bis 6 Deeg, an dann 1 bis 4 Aarbechtsdeeg fir 38% vun de Befroten;
- E ganz groussen Deel (78%) vun de Baueren, déi GAP-Ënnerstëtzung ufroen, benotzen Hëllef vun auswäertege Servicer fir hir GAP-Anträge virzubereeden an ofzeginn. D'Hëllef gëtt vu Bauereverbänn a Kooperativen a 36% vun de Fäll geliwwert, vu private Firme wéi Berodungsfirmer oder Banken (25%) oder vun ëffentlechen Autoritéiten fir 18% vun de Befroten;
- D'Hallschent vun de Befroten, déi GAP-Ënnerstëtzung ufroen, benotze keng mobil Apparater fir geo-markéiert Fotoen un d'Autoritéiten ze liwweren. Vun de 50%, déi mobil Apparater fir dësen Zweck benotzen, huet ongeféier d'Hallschent Problemer domat, besonnesch well se et zäitopwänneg fannen, net einfach ze benotzen oder et fehlt u Feedback iwwer d'Genaugkeet vun der geliwwerter Foto;
- Wat d'Kontrollen um Feld an de leschten 3 Joer ugeet, goufe 36% vun de Baueren, déi an der Ëmfro matgemaach hunn, eemol visitéiert, während 16% vun de Baueren op d'mannst 3 Visite kritt hunn. Dës Visite kënnen och Inspektiounen enthalen, déi nëischt mat der CAP ze dinn hunn. D'Virbereedung an d'Noverfolgung vun dësen Kontrollen hunn tëscht en hallwen an een Aarbechtsdag fir 63% vun de kontrolléierte Baueren erfuerdert;

- An hire Vereinfachungsvirschléi huet d'Kommissioun ugekënnegt, datt si d'Methodologie fir verschidde Kontrolle vereinfache wäert, mam Ziel, d'Zuel vun de Visitten op de Bauerenhäff vun de nationalen Administratiounen ëm bis zu 50% ze reduzéieren. Dës Moosnam äntwert direkt op Ufro vun de Memberstaaten;
- Bei der Datenerfaassung gräifen d'Bauern an der EU virun allem nach op d'manuell Opschreiwene zeréck (ofhängeg vun de Beräicher bis iwwer 50% vun de Bedeelegten). Bei 10-25% vun de Befroete ginn och informatesch Applikatioune fir dësen Zweck benotzt. An der seelenste Fäll sinn d'Erhiewunge vun den Daten automatiséiert.



2. Ugesinn dass d'Thema vun der iwerméisseger administrativer Charge an de Besoin fir administrativ Vereinfachung aktuell eng vun den Hauptuleiessen aus dem landwirtschaftleche Secteur ass, gedenkt d'Madamm Ministerin eng Etude an Opdrag ze ginn, déi d'administrativ Charge quantitativ a qualitativ evaluéiert ?

Esou eng Etude ass am Moment net fir gesinn.

3. Wann jo, wéini wäert dës Etude ausgefouert ginn, wat wäert präzis studéiert ginn a fir wéini kann ee Resultater erwaarden?

4. Wann nee, ass d'Madamm Ministerin net der Meenung, dass eng evidenzbaséiert Politik och an dësem Beräich vu Wichtigkeet ass, an des Donnéeën wichteg wiere fir e Maximum u Landwirt:innen duerch zilgeriicht an effizient Vereinfachunge maximal ze entlaaschten ?

Ech sinn am reegelméissegen Austausch mat dem landwirtschaftlechem Secteur. Zesumme mat der Landwirtschaftskammer hu mir eng Lëscht opgestallt mat de Vereinfachungen, déi an der nächster Zäit wäerten ëmgesat ginn.

Verschiddener dovunner si schonn an der rezenter Modifikatioun vum Agrargesetz enthalen. Weiderhin ass virgesinn de Prinzip vum "once only" esou gutt wéi méiglech ëmzesetzen, esou dass déi gefroten Donnéeën op a Minimum reduzéiert ginn. Digitalisatioun soll ëmmer méi eng wichteg Roll spillen, och an der Erhiewung vun den Donnéeën. Digital Applikatioune ginn erstallt fir dem Bauer seng Aarbecht ze erlichteren an d'Convivialitéit vun de Formulare fir d'Antrag ze verbesseren esou wéi den Austausch vun den Donnéeën tëscht Verwaltung, Beroder a Baueren.

D'Transparenz soll och an Zukunft eng wichteg Roll spille fir iwwersichtlech dem Antragsteller seng Infoen duerstellen.

D'Kontrolle solle manner opwenneg fir de Bauer ginn an op 1% vun den Demandeurs d'Aide vun de Bähëllefen erfogesat ginn.

An dem ganze Prozess si mir och un d'Mataarbecht an de Versteesdemech vun anere Verwaltungen a Ministère ugewise fir verschidde Vereinfachungen ëmzesetzen.

5. Nach ëmmer am Fall wou keng Etude an dësem Sënn soll duerchgefouert ginn, wéi gedenkt d'Madamm Ministerin sécherzestellen, dass hir Politicken am Beräich vun der administrativer Vereinfachung hiert effektivt Zil erreechen?

Wéi uewen ugemierkt si mir am regelméissegen Austausch mat de Baueren, Wënzer a Gäertner. Eng Consultatioun an/oder Bedeelegung vun de concernéierte Leit aus dem Berufsstand erméiglecht eis eng Praxis no Ausféierung vun de Vereinfachungen an och a Retour vum Impakt vun dëse Verännerungen.

Déi nächst Upassung vun der GAP ass an de Startlächer an d'Vereinfachunge wäerten hei an den Diskussiounen och eng grouss Roll spillen.

D'Ustreuung no Vereinfachungen ass also a fortlaufende Prozess, deen op villen Niveau'en eescht geholl gëtt.

Lëtzebuerg, den 14. August 2024

D'Ministesch fir Landwirtschaft, Ernährung a Wäibau

(s.) Martine HANSEN